

[0]時間，你去咗邊？

[1]

「樂樂，快啲刷牙瞓覺喇，好夜喇！」媽媽係噉催我。

「媽媽，我仲未想瞓住呀！」我見到個鐘長針指住6，短針指住9同10中間，即係九點半啫，我仲想繼續玩飛行棋呀——

「聽日去迪士尼樂園再玩過啦！」話口未完，媽媽就入房拉咗我去廁所刷牙……

明明放學嗰陣個鐘仲係指住4，點解眨下眼就九點半？時間，你去咗邊呀？

不過聽日去迪士尼，一定好好玩，我要快啲瞓覺！

[2]

「樂樂，好起身啦！媽媽蒸咗你最鍾意食嘅燒賣做早餐呀！」

我睅眼望望個鐘，又係九點半，兩支指針睇落好似冇郁過，但其實個天已經光晒。

我望住個鐘，望到頭都側埋，覺得時間呢樣嘢真係好神奇。

媽媽好似知我諗咩噉望住我笑：「傻豬，支時針係行完一圈走返原點，但係喺現實世界已經過咗十二個鐘——所以而家已經係朝早九點半喇！仲唔快啲起身刷牙食早餐！」

時針走一圈就過咗十二個鐘？時間，你去咗邊呀？

[3]

搭車去迪士尼嗰陣，我打醒十二分精神望住我隻錶——我要吸實支時針唔畀佢走得咁快，等我可以玩耐啲！

我望呀望，望呀望——好慢呀，佢好似冇郁過噉！

望下望下，我覺得眼皮越嚟越重，最後一片漆黑……

到我再睅大眼嗰陣，支時針已經唔經唔覺行咗一大步！

時間，你去咗邊呀？

[4]

「仲望手錶？我哋到咗喇，快啲去玩啦！」媽媽又催我喇。

最後我玩咗旋轉木馬、Winnie the Pooh、小飛象……我玩得太開心喇，開心到完全唔記得要望錶！

反而媽媽比我勤力，佢望錶：「咦，乜兩點喎，我哋食啲嘢先繼續玩啦。」

吓？！！！乜時間過得咁快嘅！

[5]

「媽媽，點解時間會過得咁快，佢去咗邊？佢係咪俾鐘錶啲指針妖怪食咗？」我忍唔住一輪嘴將我嘅煩惱同猜測話晒畀媽媽聽……

媽媽聽完先係呆一呆，然後笑到見牙唔見眼：「嘩哈哈，傻豬，你諗咗去邊呀？鐘錶係我哋用嚟睇時間嘅工具嚟，有啲唔準嘅，會行得快咗或慢咗。但真正嘅時間係一分一秒嘅流逝，唔會話走得快咗或慢咗。時間過得快或慢，係人嘅主觀感覺嚟。」

媽媽停咗停，稍為收起笑容再開口：「不過有樣嘢你講得啱，就係時間係一去不復返嘅，挽留唔到亦搵唔返——我哋唯一可以做嘅，就係好好珍惜當下，唔好虛度光陰。」

[6]

我似明非明噉望住媽媽，佢就話：「就好似我哋今日嚟到迪士尼，你會希望點樣度過喺呢度嘅時間？」

「我希望同媽媽開開心心噉過！」我諗都唔諗就脫口而出。

媽媽語帶安慰噉話：「係哩？但係你掛住睇手錶嘅話，就會錯過晒啲美好時光㗎喇！」

「噉……冇咩事我都係返去繼續玩喇！」我一支箭噉跑走——天底下竟然有咁正嘅時光，我當然要好好把握啦，嘻嘻！

00201:《時間，你去咗邊？》Where Does the Time Go?

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

"Where Does the Time Go?" (Cantonese), written by 餘星, illustrated by Chan Long, published by HamBaangLaang (© HamBaangLaang, 2022) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
